

Cingz Mbanjcuengh Youq Gizlawz

贵港市覃塘区蒙公镇民族初级中学八年级 Vangz Gangjyenz/黄港源

Gou dwg lwgmbauq dwgyaez Bouxcuengh, gou ciengzseiz cam: “Daxboh, mwngz gangj cingz Mbanjcuengh dwg gijmaz ne?” Daxboh riunyumj doiq gou naeuz: “Mwngz gag bae ra ha!”

Nanzdauh cingz Mbanjcuengh ndoj youq ndaw laeujvan haeux-naengj? Geiqndaej bineix “sam nyied sam”, gou miz faenh youq bakdou hagdangz — Mungzgungh Minzcuz Cunghyoz eu fwen ciep hek. A! Cingz Mbanjcuengh youq gizneix dahraix! Ngoenzde dou daenj hwnj buhvaq Bouxcuengh hoengzhoengz loegloeg, gyaundeid dangqmaz. Dou baiz baenz song doih, ndwn youq song mbiengj bakdou hagdangz, angq eu fwen Bouxcuengh ciep bouxhek. Bouxhek baenz bang baenz gyoengq daj gizgyae daeuj, singgo dou rwenzrd: “Beix ya nuengx vei, muengh bae muengh dauq daengz dou ranz le, gingq hek sam vanj laeuj haeuxnaengj, fwen swnh laeuj hom sing goksa, beixnuengh vei, cingzngieih naekna gingq ya gingq dangqnaj.” Cingz Mbanjcuengh daeuj lo! Aenvanj beij aennaj dou lij hung haenx, cungj daek rim laeuj, dou song fwngz gingq hawj bouxhek, bouxhek song fwngz ciep vanjlaeuj, gaemz hung ndoet roengz dungx bae. Cingz Mbanjcuengh daj ndaw laeuj hom rih okdaej, daj ndaw yiedcingz vunz Bouxcuengh ndonj okdaej lo!

Bouxhek gwn laeuj gvaq le, couh



bae yawj diuq fouxfaexsax. Gwnz cauhcangz vunz lai vunz daih, song diuz faexsax doxbungq seiz fat ok sing yiengjdoekdoek, bouxdiau swnh faexsax hai hab diuq haeuj diuq ok, gyoengqde angqvauvau guh gak cungj dungcoz, bouxhek youq henz yawj ndaej din fwngz humzsis. Boux mbeihung yamq ok yamq daih'it, gyoengqde yien fwngz hagseng, hagseng son gyoengqde riengz sing faexsax “hai hai hab hab, hai hai hab” yamq haeuj diuq ok, bouxhek diuq ndaej geijlai yinxdaeuz ha! Gij hek siengj diuq youh lau geb din

haenx, doeklaeng nyaenx mbouj ndaej hix mbeihung diuq hwnjdaej lo. Yawj, cingz Bouxcuengh mbouj dwg youq ndaw sing riu angqyangz diuq fouxfaexsax haenx ha?

Gangj sat cingz Mbanjcuengh “sam nyied sam”, caiq daeuj gangj-gangj “ciet makmoed” ranzmbanj dou ba! Moix bi liggaeuq loeg nyied congeih ngoenz haenx, daengx mbanj nauhnauh yiedyied. Haetcaeux, ranz-ranz gaj bit gaj gaeq, bit gaeq dumq cug le, rap bae caeqbaiq, cuengq bauq yiengj mbouj dingz. Ndaw mbanj lauxlaux cozcoc, bouxboux

cungj nyaengq guhhong. Lwngnyeiz bae mbaet makmoed, baenz foengq baenz foengq makmoed youh hung youh henj venj youq gwnz ngafaex, naekgywg duengh doxroengz, gwn haeuj bak bae, youh van youh diemz; daxmeh caeuj mehsimj swiq byaek baij daiz, miz gangj miz riu; daxboh daxau ronq noh yiengjdukduk; daxbuz bau ceiz, daxgoeng caq, aen ceiz caq ndei de henjrwgrwg, youh rang youh byoiq. Daxboh umj biengx laeuj makmoed de okdaej, baez hai fabiengx, feih makmoed swnhhom ndonj haeuj ndaeng vunz bae, caen hawj vunz caengz gwn couh fiz lo! Bouxhek laebdaeb daeuj daengz lo, ndawmbanj nauhyied hwnjdaej lo, gijgwn ndei-gwn baij rim daiz, bouxsai itmienh gwn laeuj itmienh caimax, sing hemq coenz beij coenz sang, mehmbwk itmienh gwn itmienh gangjgoj, seiz mbouj seiz riuhaha, lwngnyeiz mbouj ndeindei naengh daiz, cix dwg angqvauvau buet bae buet dauq. Daengx mbanj cungj deng heiqrang makmoed caeuj sing angqyangz humxdawz lo. Seizneix, cingz Mbanjcuengh hix okdaej lo, gyaux youq ndaw feihrang makmoed caeuj sing angqyangz.

Gou ra raen cingz Mbanjcuengh lo, youq ndaw vanjlaeuj, youq ndaw fouxfaexsax, youq ndaw gijgwn ndei-gwn, youq ndaw vah gangjriu……

(boux lauxsae son'gyauq Vangz Fungli)



Bengcag Doxdax

贵港市覃塘区蒙公镇高占小学
五年级 Leiz Yaujdungh/雷晓东

Ngoenzneix, nditrongh raeujrub, duzroeg youq gwnz faex ciengqgo, dou sim'angq raixcaix, aenvih dou haj nienzgaep 6 aen ban yaek guh ciengz bengcag doxdax gig mizyinx ndeu.

Dou daj gyausiz roengzdaej, byaij coh cauhcangz, bouxboux nu fwngz dik din, gip dwk sikhaek doxdax. Miz mbanj angqvauvau doxgot youq itheij, miz mbanj humx guhdoih caez ok geiqmaeuz, doxyaeng baenzlawz hingz ndaej engq vaiq, miz mbanj youq henz guh ndei cungbei. Geizcaij youq henz cauhcangz mbin-fafa, lumjbaenz hix vih ciengz bengcag doxdax neix gyayouz ne!

“Be——” Sing sauq baez yiengj, dou haj it ban caeuj haj ngeih ban doxdax lo. Dou haenqrengz

beng dauqlaeng, hoeng, baengzhoengz cungqyang lij dwg mbouj doengh saek di. Sawqmwh, doiqfueng baez okrengz, dou deng beng baenaj, ceng di couh laemx baenaj lo. Song mbiengj lahlahdui sing hung hemq “ban haj it gyayouz”, “ban haj ngeih gyayouz”…… Sing hemq neix lumjbaenz hawj ndang dou guenq cungj ligliengh ndeu. Dou ok daengx ndang rengz, buekmingh beng doxma. Diuzcag yaengyaeng gaen dou gvaqdaej di ndeu lo, daihgya mbe bak haeb heuj, fajnaj yakyawj raixcaix. Yienghceij Lij Gyahloz cieq mizyinx, de laep song da, najbyak nyaeuq ok sam diuz sienq, haeb faenz haeb heuj, gij yienghceij neix lumjbaenz in ndaej yaek dai mbouj lix. Dou bouxboux cungj buek-

mingh lo, hoeng, doeklaeng lij dwg saw lo.

Ciengz daihngieih dwg fuzhozsai, dou miz ginghniemh lo, daihgya gaem maenh diuzcag, song din capmax, gunj hwet buenq nyaeu ndang. Aensauq baez yiengj, dou caeuj doiqfueng cungj haenqrengz beng, doiqfueng fwt fatrengz, gou youq gwnz dieg gyod mbat ndeu, baengzhoengz deng beng gvaqbae lo, 1 mij! 90 lizmij! 50 lizmij! 30 lizmij……Yaek saw lo, gyoengq bouxyawj sing hemq gyayouz daenh ndaej rwz nuk bae, dou daengx ban doengzhag sim cungj diuq daengz henz hoz lo. Gou rengz gwn cij cungj ok liux lo, haiz hix ngad mbongq

congh lo. Canh Dwngzfeih youq baihnaj gou, fajnaj de hoengzfoedfoed, de hemqnga'nga, sing hemq lumj gaj mou mbouj dai ityiengh. Couh youq seizde, doiqfueng hix ok rengz sat lo, dou swnh gyoengqde miz di cuengqsoeng, caez ok rengz, yaep ndeu couh beng dauqma hauilai, dou laebdaeb fatrengz, ye! Dou hingz lo! Daihgya angq dwk diuq hwnjdaej.

Yienznaeuz baez doxdax neix ban dou cij ndaej daihseiq mingz, hoeng, dou caenhrengz lo. Gou sim siengj, baizmingz gonqlaeng mbouj youqgaenj, youqgaenj dwg dou gaenq caenhrengz lo.

(lauxsae son'gyauq Cuh Veimingz)

